

Yr Arglwydd Dafydd Elis-Thomas AC

Y Dirprwy Weinidog Diwylliant, Chwaraeon a Thwristiaeth

Llywodraeth Cymru

3 Mai 2019

Annwyl Dafydd,

Diolch i chi am eich ymateb i'm llythyr ynghylch y cymorth a ddarperir i orsafoedd radio cymunedol.

Mae'n galonogol clywed y bwriedir defnyddio gorsafoedd radio cymunedol mewn perthynas ag ymgyrchoedd arfaethedig y Llywodraeth ynghylch Rhianta Cadarnhaol a Thasglu'r Cymoedd, a bod mwy o gyfleoedd wedi'u nodi i'w defnyddio yn y dyfodol. Rwy'n ddiolchgar ichi am ysgrifennu at yr holl asiantaethau y mae Llywodraeth Cymru yn eu defnyddio i hyrwyddo eich ymgyrchoedd gwybodaeth gyhoeddus i'w hatgoffa i gynnwys radio cymunedol yn eu cynlluniau hysbysebu.

A wnewch chi ddarparu gwybodaeth i'r Pwyllgor am werth hysbysebion y Llywodraeth ar radio cymunedol, sy'n cael ei choladu gan y rheolwr Fframwaith, pan fydd y wybodaeth honno ar gael? Bydd y manylion hyn yn rhoi darlun cliriach i ni o'r graddau y mae radio cymunedol yn cael ei gefnogi gan y Llywodraeth.

Bydd y Pwyllgor yn cynnal digwyddiad yng Nghaerdydd i randdeiliaid ym maes radio cymunedol ar 20 Mehefin. Rydym wedi gwahodd cynrychiolwyr i drafod y materion y mae'r sector radio lleol a radio cymunedol, yn arbennig, yn eu hwynebu, a byddwn yn cael cyfle bryd hynny i ystyried eich ymateb yn fanylach. Cyn hynny, hoffwn ofyn am ragor o wybodaeth am y cymorth ariannol a allai fod ar gael i'r sector.


Mewn ymateb i'n hargymhelliad bod Llywodraeth Cymru yn adfer y Gronfa Radio Cymunedol, dywedasochn:

'nid yw ein safbwynt mewn perthynas ag ailgyflwyno'r Gronfa wedi newid a byddai angen ystyried hyn yn unol â blaenoriaethau eraill y mae angen rhoi sylw iddynt. Byddai angen gwneud achos cryf i ddangos y byddai Cronfa newydd yn ychwanegu gwerth sylweddol at argaeledd ac effaith radio cymunedol ledled Cymru, yn enwedig tra bod gorsafoddd yng Nghymru eisoes yn gallu gwneud cais am arian gan y Gronfa Radio Cymunedol a weithredir gan Ofcom.'

A allwch egluro pa feini prawf a gaiff eu defnyddio i benderfynu a oes achos cryf wedi'i wneud dros ailsefydlu'r gronfa? Gall y wybodaeth honno lywio ein trafodaethau yn y digwyddiad rhanddeiliaid. Mae'r rhai a fydd yn mynd i'r digwyddiad eisoes wedi nodi eu bod yn awyddus i fynd i'r afael â'r mater hwn ar y diwrnod hwnnw, a hoffwn ddarparu gwybodaeth i'n Haelodau ymlaen llaw.

A wnewch chi ymateb i'r cais hwn erbyn 31 Mai er mwyn i mi gael cyfle i ddarparu'r wybodaeth ddiweddaraf i'r rhanddeiliaid a alwodd am ymchwiliad i'r pwnc hwn?

Yn gywir,



Bethan Sayed

Cadeirydd y Pwyllgor

Yr Arglwydd Elis-Thomas AC/AM
Y Dirprwy Weinidog Diwylliant, Chwaraeon a Thwristiaeth

Deputy Minister for Culture, Sport and Tourism



Llywodraeth Cymru
Welsh Government

Ein cyf/Our ref: MA - P/DET/0364/19

Bethan Sayed AC
Cadeirydd
Pwyllgor Diwylliant, y Gymraeg a Chyfathrebu
Cynulliad Cenedlaethol Cymru
Bae Caerdydd
CF99 1NA

21 Mai 2019

Annwyl Bethan,

Diolch am eich gohebiaeth dyddiedig 3 Mai mewn perthynas â radio cymunedol yng Nghymru.

Yn ymateb Llywodraeth Cymru i adroddiad y Pwyllgor, ac yn fy ngohebiaeth dyddiedig 9 Ebrill, amlinellais ein safbwynt mewn perthynas â Chronfa flaenorol Llywodraeth Cymru ar gyfer Radio Cymunedol.

Mae'r cyfryngau wedi esblygu'n sylweddol yn ystod y blynyddoedd diwethaf. Mae'r ffyrdd y mae pobl yn dod o hyd i wybodaeth ac yn ei defnyddio yn newid, gan gynnwys ar lefel leol. Nid yw'n eglur felly a fyddai Cronfa newydd gan Lywodraeth Cymru ar gyfer Radio Cymunedol yn effeithio ar sut y mae pobl yn cael gwybodaeth leol fel y gwnaeth o'r blaen – yn enwedig gan fod gorsafoedd yng Nghymru yn gallu ymgeisio am gyllid o'r Gronfa Radio Cymunedol a weithredir gan Ofcom. Nid ydym yn ymwybodol bod gan y sector radio cymunedol yng Nghymru unrhyw bryderon am gronfa Ofcom. Y llynedd, gwnaeth Ofcom wahodd ceisiadau i wella'r gwasanaeth presennol ac i ehangu gwasanaethau radio cymunedol. Deallwn fod gorsafoedd yng Nghymru wedi dangos cryn dipyn o ddiddordeb¹. Mae Ofcom yn dal i brosesu'r ceisiadau ar hyn o bryd.

¹Gweler yr adran o'r enw "Coverage improvement and extension requests" yma <https://www.ofcom.org.uk/manage-your-licence/radio-broadcast-licensing/monthly-updates/radio-broadcast-update-march-2019>

Bae Caerdydd • Cardiff Bay
Caerdydd • Cardiff
CF99 1NA

Canolfan Cyswllt Cyntaf / First Point of Contact Centre:
0300 0604400

Gohebiaeth.Dafydd.Elis-Thomas@llyw.cymru
Correspondence.Dafydd.Elis-Thomas@gov.wales

Rydym yn croesawu derbyn gohebiaeth yn y Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Pe bai sylfaen dystiolaeth gref yn cael ei darparu a fyddai'n dangos yn glir unrhyw effeithiau arwyddocaol ychwanegol y gallai cronfa newydd yng Nghymru eu cael ar y cyfryngau presennol, byddai'n cael ei hystyried yn unol â blaenoriaethau cystadleuol a phwysau cyllidebol eraill.

Fel yr amlinellwyd yn fy llythyr dyddiedig 9 Ebrill, gofynnwyd i asiantaethau hysbysebu ddarparu manylion i'r Rheolwr Fframwaith am waith ymgysylltu y maent yn ei wneud ar ymgyrchoedd Llywodraeth Cymru, ynghyd â gwerth hysbysebu. Bydd hyn yn ein galluogi o hyn ymlaen i gasglu'r manylion a'r gwerthoedd hyn bob chwe mis a byddwn yn rhoi'r wybodaeth ddiweddaraf i'r Pwyllgor pan fydd y set gyntaf o ffigurau ar gael.

Yn gywir,

A handwritten signature in black ink, appearing to read 'J. Elis-Thomas'.

Yr Arglwydd Elis-Thomas AC
Y Dirprwy Weinidog Diwylliant, Chwaraeon a Thwristiaeth
Deputy Minister for Culture, Sport and Tourism